

東

華

錄

東華錄

康熙九十六

臣王先謙敬編

臣周澍蕃恭校

七月甲午朔諭議政大臣等近和托輝特公博貝奏請招撫吳梁海及策妄阿喇布坦所屬厄魯特杜爾伯特丹津一千戶人若伊等抗拒不服卽行攻取等語似此動作以張聲勢甚是其間設有不睦致相仇敵聞博貝之兵前往以爲大軍將至紛紛擾亂便可得彼真信雖策妄阿喇布坦兵來救援地方亦遠更有阿爾泰山之雪攔阻不能前進矣又據博貝奏臣有兵一千五百度已足用若聖意以爲尙應添兵則有根敦扎薩克羅卜藏所屬翁科特兵扎薩克濟納米達兵扎薩克台吉阿里雅兵俱善於攻戰可以破敵將此三扎薩克兵添給足矣著照博貝所請將三扎薩克兵添

給博貝帶領前去遣人往吳梁海處以好言招撫若不歸順逃入樹林深密處亦無關緊要相機行事可也至杜爾伯特丹津處應再探其情形或撫或剿博貝領兵前往時若有策妄阿喇布坦兵向我喀爾喀直衝前來卽著尾其後以牽制之杜爾伯特丹津與厄魯特散秩大臣車領爲兄弟可令車領遣一親信人寫給書信爾等見在所議之事發與博貝或派章京或筆帖式飛馳發往並帶車領人同去卽隨博貝兵一齊進發○甲辰大學士李光地以老病乞解任葬親命給假二年營葬畢仍來京辦事○子故原任福建浙江總督梁鼎祭葬○兵部議准四川陝西總督鄂海奏四川建昌鎮屬涼山夷目祿應麟率部落歸順請授爲土千戶准其世襲從之○戊午議政大臣等議准肅州總兵官路振聲奏兵部文令臣移駐哈密城後托河齊哲克得里等處查此地卽哈密第

三堡西北之沙棗泉其地溼熱馬難肥壯沙棗泉西北九十里有山名爲無克克嶺其山下卽巴爾庫爾地方山上遠瞭甚明臣領兵移營於此要路駐紮其餘山峽小徑俱撥兵防護俟額駙阿寶輝特公羅卜藏等兵到日於巴爾庫爾地方再議駐紮之處從之○辛酉以張伯琮爲河南布政使由按察使遷○議政大臣等議奏奉旨屯田事令右衛將軍宗室費揚固等確議今據費揚固等奏以屯田事詢喀爾喀土謝圖汗等據稱蘇勒圖哈拉烏蘇并達拉克河明愛察罕格爾庫爾奇勒扎布罕河察罕梭爾布拉罕口烏闌古木等處俱可種地再臣等所統兵丁見駐紮察罕托輝托布罕河特斯河一帶地方應派善種地之士默特兵一千名每旗派台吉塔布囊各一員前往耕種遣大臣一員監管應如所請再哈密地方亦可耕種應行文將軍席柱尙書富甯安將西吉木布隆吉

爾等處勘明具奉得旨依議公傅爾丹情願前往效力卽交伊辦理再著原任都統宗室愛音圖護軍統領達米納侍郎能泰鐵圖同往

八月丁卯以王朝恩爲廣東布政使

由湖南按察使遷

蘇瞻爲山西布政

使

由郎中遷

○辛未大學士李光地以予假葬親至行宮謝恩

上親

製詩以賜並敕諸王大臣各賦詩送之○癸酉上行圍發熱河

○己卯右衛將軍宗室費揚固以病求解任得旨費揚固著帶右衛將軍印徐回右衛今年旣不進兵將右衛等處兵交與散秩大臣祁里德喀喇沁塔布囊額駙格勒爾齊齊哈爾副都統白濟右衛副都統齊格公同管理著都統穆賽馳驛前往總理軍務俟進兵時另派大將軍給與印信○壬辰鑾儀使董大成奏臣於六月二十二日領兵從肅州出嘉峪關自嘉峪關至噶斯口三千餘里

行至常馬爾河因山水暴發所有運米牲口及兵丁所乘馬匹多致損傷倒斃於八月十二日抵噶斯口得旨自邊上至噶斯口一千七百里曾經阿南達奏過今董大成何以又稱有三千餘里噶斯口路徑甚窄策妄阿喇布坦斷不由彼行走今正寒冷之時著董大成將噶斯口迤內放火燒荒領兵回赴肅州

九月癸巳朔諭議政大臣等今年既不進兵令富甯安回至肅州料理一應軍務錢糧俟明年進兵時再令前去○丙午 上駐蹕博洛和屯賜來朝外藩等銀幣鞍馬及隨圍喀喇沁官兵銀布○己酉刑部等衙門議覆吏部尙書張鵬翮奏原任江蘇巡撫張伯行以海上有賊欺君妄奏監斃良民數人之處皆實應照律將張伯行擬斬監候秋後處決應如所請得旨張鵬翮回京將張伯行帶來日再奏○和托輝特公博貝奏招撫吳梁海已經歸順大

學士等奏曰四年前吳梁海頭目和羅爾邁爲我哨兵擒獲 皇上寬恩不殺又加重賞遣回以此感恩早欲投順但以妻子艱於攜帶恐爲厄魯特所追故遲延至今頃聞策妄阿喇布坦侵犯哈密之信已先遣子胡洛虎納等前來輸誠適博貝兵到吳梁海卽時歸順此皆由 皇上之恩淪肌浹髓故不發一矢而遠人向化如此 上曰前吳三桂遣猓猓數萬到平涼助王輔臣與我軍對敵後來歸順諸大臣皆欲殺之朕謂何以殺爲歸順卽良民矣悉加恩宥發回原籍後進四川至保甯賊又欲率伊等與我軍對敵猓猓頭目陸道清去我等雖無知識前蒙聖主不殺之恩豈忍對敵卽登山去平賊之後伊等方下山引導我軍極其效力再攻取尼布潮雅克薩城之時鄂羅斯數千人諸大臣亦欲盡殺之朕從寬遣回西洋國聞之皆欲歸順攻其城而遣回其人亘古未有今

吳梁海歸順固自然之理也○庚戌 上還熱河○乙卯巡視南城御史任奕璽奏參左都御史劉謙令家人柴敬臣等同伊婿侍衛王廷梅家人顧光祖等十餘人登臣門毀罵復親同其子編修劉自潔至臣寓令家人擊傷臣頭面手足諸處得旨著吏兵刑三部嚴察議奏○是月免湖南安鄉等五縣衛水災額賦有差

冬十月丙寅諭大學士等閱刑部秋審奏章繁複者甚多皆由府州縣司道各官審錄供招盡行全載所致該府司道果誠有別情自應敘入若無互異之處但註明該府司道與州縣各官歷審皆同一語止將州縣初招並督撫等大吏審擬之處敘明本內足矣此非爲朕便於省覽案牘繁多則事務亦必致遲延矣又諭各處奏摺所批硃筆諭旨皆出朕手無代書之人此番出巡朕以右手病不能寫字用左手執筆批旨斷不假手於人故凡所奏事件惟

朕及原奏人知之若有漏洩亦係原奏者不密朕聽政年久未嘗輕以語人也又諭辦理事務固不可不知文理然亦須諳練政務之人方善若遇大事不可徒執虛文又如外省督撫但以不貪爲盡善以朕觀之清乃居官一端之善苟於地方生事雖清亦無益也○戊辰鑾儀使董大成奏臣至噶斯口巡查並無來往人迹噶斯地方三面雪山中有一綫水草皆係蘆葦其大路在得布特里地方西南走藏東南走青海西甯大通河半月卽到永固城西北走柴旦木吐魯番等處乃策妄阿喇布坦出入咽喉要路又據夸蘭大吳通保等各報兵丁兩月口糧已完運米官又不能全運至噶斯地方是以臣於九月十一日移駐得布特里地方得旨董大成已有旨著回肅州到後著勒限馳驛來京其官兵交尙書富甯安統轄○戶部尙書穆和倫以老病乞休允之○壬申 上奉

皇太后自熱河回鑾○予故原任刑部尙書胡會恩祭葬○辛巳上奉 皇太后回京師○丁亥吏部等衙門議覆左都御史劉謙及子編修劉自潔縱僕毆傷御史任奕鑾是實劉謙劉自潔應革職其家人柴敬臣等照律治罪侍衛王廷梅身在熱河應無庸議得旨劉謙器量褊淺考試進士聲名亦甚不好率僕毆傷御史殊玷官箴劉謙劉自潔俱著革職餘依議○吏部議覆奉差江南審事尙書張鵬翮等奏原任江蘇布政使牟欽元前經巡撫張伯行以藏匿張令濤奏參革職今張伯行旣自認誣參請罪應將牟欽元照例復職從之○戶部尙書趙申喬奏臣子山西太原府知府趙鳳詔居官不肖受贓三十餘萬兩撫臣列參臣不能教子求賜罷斥得旨朕禮遇諸大臣甚優自始至終無不期其保全凡官員才守及居官之處靡不詳察朕曩巡狩至龍泉關駐蹕之日曾

面詢趙鳳詔噶禮居官何如趙鳳詔奏稱噶禮爲山西第一清廉官朕以趙鳳詔乃趙申喬之子斷不欺朕因擢噶禮爲江南總督趙鳳詔又以居官受賄比之婦女失節朕諭爾言雖鄙誠如此存心甚佳逮噶禮事敗後朕以趙鳳詔居官處詢尙書張鵬翮而張鵬翮言其貪婪近晉撫蘇克濟參奏趙鳳詔受賄甚多今閱趙申喬所奏其詞意忿激殊非大臣之體著飭令在任供職○壬辰諭大學士等凡滿漢大臣遇事應同心辦理今每滿洲大臣一議漢大臣一議此處大有關係 世祖章皇帝時爲此曾下嚴旨至今聖訓昭然可不恪遵耶如果兩議亦應滿漢相間豈可截然兩議從前未曾如此自趙申喬來始然凡事止有一理不可執拗今朕聽政五十餘年何者不會經歷卽小事必向大學士學士九卿問之大臣執拗猶之可也若爲君者自行執拗則如之何著將滿

漢兩議者交與吏部都察院察出議罪○諭戶部朕早夜孜孜軫懷民瘼四方水旱時勤咨詢惟恐閭閻之蓋藏未裕一遇歉歲收穫失望窮黎卽無以資生也直隸順天保定河間永平宣化五府所屬地方今歲雨水過溢田畝被淹者甚多穀耗不登民艱粒食見今緩徵賑貸雖惠澤頻施而來春應辦錢糧若仍行徵取恐匱乏之民輸將難繼著將五府州縣康熙五十五年地丁銀八十五萬五千八百兩零糧米豆穀一十一萬五千五百石零草九萬四千九百束零俱通行蠲免

十一月甲午以范時崇爲左都御史

由福建浙江總督遷

○乙未賑陝西延

安府龍州堡等屬饑○戊戌諭大學士等刑部侍郎博音岱人才不及凡事疏忽兵部侍郎巴顏柱年老人才不及俱著革職○庚子兵部議覆偏沅巡撫陳瓚條奏請禁加耗一疏 上諭大學士

等朕御極五十餘年於誠僞公私之介詳加審辨萬幾之暇勤求古帝王先聖治理無不專務誠敬屏棄虛浮先行其言而後從之垂訓甚明是以朕孜孜圖治亦皆崇尚實政不貴空言督撫係地方大吏凡關繫民生興利除弊有裨風化鼓舞士子果有真知灼見者卽應竭慮殫心見諸躬行以利地方若徒撫拾浮辭沽名要譽不但無裨政治且恐有累民生卽如張伯行初授巡撫時卽稱移風易俗家給人足報效朝廷迨後絀於才力張弛失宜反致漸生事端擾累民生地方盈甯之狀迥不如前此非不能身體力行言過其實之故乎今覽陳瓊條奏皆伊分內應行事宜當於力見施行後再行具奏乃將空言妄陳殊屬無謂且督撫膺地方重任最重者年穀順成民生樂業陳瓊補授湖南巡撫眾災紛紛此必撫綏安輯未盡其道上千天和之所致也奏稱湖南徵收錢糧每

兩加至一錢二三錢不等並不指明加徵起自何年趙申喬昔任偏沅巡撫時居官甚清其於加耗一事禁止甚嚴今覽陳瓚所奏豈趙申喬亦未曾禁止耶陳瓚身係撫臣一切事務不圖躬行實踐將久經定例禁止之事故張大其言沽名條奏殊玷官方加耗起自何年何撫著陳瓚卽行指參○宗人府奏臣等遵旨確審輔國公阿布蘭首告正紅旗滿洲都統公普奇縱徇醫生賀孟頴以礬水寫字通信二阿哥一案賀孟頴因醫治二阿哥福金病二阿哥令伊將緊要事密送信息遂用礬水寫字往來又屬託普奇保舉二阿哥爲大將軍又稱從前澤卜尊丹巴胡土克圖曾言二阿哥災星未脫因復探聽澤卜尊丹巴胡土克圖來京之信又妄稱皇上有褒獎二阿哥之旨各處探聽冀有釋放信息普奇具悉其情不行奏聞普奇又有若齊世扎喇克圖爲將軍我必告請出

兵之語惡亂已極應將普奇擬絞立決賀孟頴擬斬立決得旨普奇著照前拘禁賀孟頴著改擬斬監候○戶部右侍郎廖騰燧以老乞休允之○設貴州安順府南籠廳學○辛丑諭大學士等張伯行爲巡撫時每苛刻富民如富民家堆積米粟張伯行必勒行賤賣否則治罪此事雖窮民一時感激要非正道亦止爲米價翔貴欲自掩飾耳地方多殷實之家是最好事彼家貲皆從貿易積聚並非爲官貪婪所致何必刻剝之以取悅窮民乎況小民無知貪得無厭近聞陝西有方耕種卽挾制州縣報荒者此等刁風亦不可長又賑荒一事苟非地方官實心奉行往往生事蓋聚飢寒之人於一鄉勢必爭奪明時流賊亦以散糧而起此不可不慎也書云明四目達四聰朕於天下事無不洞悉然知之而卽發亦非大體總之爲政以中正誠敬爲本中正則能公誠敬則能去私朕

日讀性理諸書見得道理如此○以宋儒范仲淹從祀孔廟○癸

卯諭吏部翰林何焯爲人狂妄眾所共知朕欽賜以舉人進士伊

當終身感激乃生性不識恩義將今時文章比之萬厯末年文章

將伊女與允禩撫養又爲潘耒之子夤緣罪應正法但念其稍能

記誦從寬免死著將伊官銜並進士舉人革去在修書處行走如

不悛改著該管官員卽行參奏○以覺羅滿保爲福建浙江總督

由福建巡撫遼寧黨阿賴爲兵部右侍郎由光祿寺卿遷○戊申賜塞都等一百七

人武進士及第出身有差○己酉諭大學士九卿等部院司員見

在官職雖卑日後亦可致大寮伊等朕多不認識必數數問諸大

臣而用之亦不勝其煩今觀部院司官等劣者甚多前考校武進

士馬步射時侍郎覺和託舉止粗鄙向背不知何以辦事又有一

司官因劣革退舊例滿洲不分文武兩途出征時則令於夸蘭大

章京等處行走此後部院衙門滿洲司官著輪班佩刀在侍衛裏行如此賢否始見部院漢司官等朕亦未盡認識應照見今翰林官分班行走例令伊等分班引見○諭今科道官員雖有條陳多出私意簡任言職不可任結納聲氣之人若使互相標榜援引附和其勢漸成朋黨矣又如理學之書爲立身根本不可不學不可不行朕嘗潛心玩味若以理學自任必致執滯己見所累者多宋明季世人好講理學有流入於刑名者有流入於佛老者昔熊賜履自謂得道統之傳其歿未久卽有人從而議其後矣今又有自謂得道統之傳者彼此紛爭與市井之人何異凡人讀書宜身體力行空言無益也○以明安爲刑部右侍郎

由左副都御史遷

○辛亥諭

議政大臣大學士九卿等天下承平日久漢官但能作無實之文說見成話至軍務大事並不能盡職平日嘗謂旗員赴任多挈人

口騷擾地方漢官家口少所需無幾朕因此曾屢向漢大臣言漢官不能騎馬耐勞設有緊急之事邊塞地方必專用旗員方有裨益漢官或自謂清廉不取不與節用度日如解馬運糧等事督撫俱差州縣漢官漢人止一二僕從何濟於用遇勞苦之處旋亦逃亡縱令參處何益彼亦但願任咎卸事將所得官囊回籍自娛耳朕曾親統大軍經歷軍務甚多用兵無謀略學問斷然不能朕閱宋明馬政兵書皆紙上空談全無用處朕安不忘危時勤訓練見在官兵俱各出口效力地方文官有何效力之處爲督撫者明賞慎罰以鼓勵兵丁臨事時方能致命效死平日並無恩惠彼何所感而捨身效力耶漢人率以塞外遼闊地少水草行走艱難不能乘騎爲辭如滿洲蒙古每歲塞外居住漢人何以不能此皆不習慣行走之故耳川陝督撫賴是滿洲如張伯行爲之必致誤事張

伯行任江蘇巡撫時見漁船數隻疑爲海賊遂致張皇如遇此等
口外事情不知如何處置李之芳任浙閩總督時領兵親戰豈可
謂漢人中無其人但如此等人甚少耳○乙卯江南江西總督赫
壽丁母憂命在任守制○諭大學士等前會屢次議將張伯行拏
問朕念張伯行居官清廉不受餽送故不准拏問伊缺未經補授
今調來引見甚屬糊塗實非堪任巡撫之人但能杜苞苴操守甚
好可於錢糧無多處令其管守○諭吏部事務甚屬緊要張鵬翮
雖丁艱著暫畱辦事俟富甯安回日再令張鵬翮回籍守制

十二月癸亥朔予故原任刑部尙書安布祿祭葬○甲子以劉相

爲左副都御史

由通政使遷

○丁卯調陳瓚爲福建巡撫以李發甲爲

偏沅巡撫

原任

○己巳以吳存禮爲江蘇巡撫

原任雲南巡撫

○辛未諭大

學士等朕昨召陳瓚入見細察其舉動言語實係清官且陳瓚係

海濱務農之人非世家大族又無門生故舊而天下之人莫不知其清非有實行豈能如此朕面諭陳瓚云爾爲巡撫與爲司道等官不同若貪財好利誠爲非理但應得之物亦宜取爲賞兵之需身爲封疆大吏而室中蕭然無一物可以與人亦非大臣所宜夫第謂一介不以與人一介不以取諸人豈真一無所取不過不肯與人到後日仍是自肥耳陳瓚亦深心服至陳瓚之學問雖平常而其才尙能辦事凡爲地方官者但能持己以正不爲非法之事卽稱良吏如陳瓚者豈可多得國家得此等人實爲祥瑞允宜從優表異以鼓勵清操朕所以寬容張伯行者正愛其清耳○諭大學士等劉蔭樞屢奏稱貴州按察使白潢居官好內外官員無論滿漢大小有如陳瓚李陳常者爾等善爲畱心昔年九卿保舉兩淮鹽運使張應詔操守好如此等人俱屬難得江南學院余正健

操守甚好但不知其辦事之才何如爾可傳諭九卿有如陳瓊之
清操爲人所共知者著奏聞○甲戌諭大學士等武官不論大小
朕俱親驗補投各於營伍事務黽勉效力部院滿洲司官令人侍
衛班次行走漢官亦時常引見所以俱各勤謹惟外省州縣官員
雖調來引見仍未能周知九卿大臣俱有言責伊等亦當畱心可
傳諭之○丙子以張聖弼爲湖廣按察使由直隸巡道遷○癸未諭大學
士等方春祭 祈穀壇原用上辛日明年正月初十乃上辛日尙
未立春前亦有用次辛下辛祭者此處大學士會同太常寺議奏
尋大學士等議覆應擇明年正月三十日下辛日祭 祈穀壇從
之○甲申諭大學士等倉場侍郎呂履恒爲人甚懦著調補戶部
右侍郎張伯行係革職之員著授爲總督倉場侍郎於倉廩工上
戴罪效力○以顧悅履爲內閣學士原任○予故戶部侍郎王原祁

祭○乙酉諭戶部前因甘肅靖遠衛等處年歲歉收既已多方籌畫蠲賑頻施復將甘肅被災二十八州縣衛所康熙五十四年額徵銀糧草束通行蠲免但被災之餘民鮮蓋藏若非再沛德施恐來歲辦賦猶艱除甯州隴西渭源狄道臨洮五州縣衛康熙五十五年額徵銀糧草束已經蠲免外其靖遠等二十八州縣衛所康熙五十五年額徵銀九萬七千八百七十兩零糧二十三萬九千四十石草二百五十三萬七千八十束零亦盡與蠲免○是月免安徽邳州等十八州縣水災額賦有差○是歲朝鮮琉球來貢○人丁戶口二千四百六十二萬二千五百二十四又永不加賦滋生人丁十七萬三千五百六十三田地山蕩畦地六百五十九萬七百六十四頃九十畝有奇徵銀二千九百七十九萬五千三百九十兩有奇米豆麥六百五十九萬二千石有奇草一百五十萬

八千四百七十四束茶三十四萬一千四百二十四引行鹽五百
九萬九千八百五引徵課銀三百七十四萬一千一百二十四兩
有奇鑄錢三萬八千六百五十五萬九千九百有奇

東華錄

康熙九十七

臣王先謙敬編

臣周澗蕃恭校

康熙五十五年丙申春正月壬子 上幸湯泉○癸丑以王之麟

爲浙江按察使

原任廣西按察使

毛文銓爲江南按察使

原任貴州按察使

張孟

球爲河南按察使

由糧道遷

二月壬戌朔諭議政大臣等運送糧餉安設臺站牧養馬匹等項俱係領兵將軍職任今米糧不能運至皆由水草不足之故朕昔親統大兵中路出征時沿途必留有水草之處以牧運米牲畜爾等所親知者身爲領兵將軍此等事不能深曉領兵直前致沿途水草如火燒赤地後隊兵馬及運米人役牲畜有不致困乏者乎朕曾屢諭眾大臣云領兵將軍甚難凡事不可不周到今歲停止

進兵候種地及一應事物豫備完畢審察兩下軍情再行定奪者
爲此故也且去年駐防哈密兵二百名戰敗策安阿喇布坦時眾
大臣俱欲進兵路途遙遠米糧焉能接濟見在駐紮食用米糧尙
不能接續若彼時卽行進剿不知作何景況矣如喀爾喀一路都
統穆賽等所統之兵俱係滿洲蒙古熟練之人並無糧餉不足等
事將軍席柱等所統之兵尙未熟練所以如此儻運糧不至所關
甚大行令將軍席柱提督師懿德等酌留足用汛守調遣之兵其
庸懦不堪者著會議撤回○癸亥宗人府奏原任黑龍江將軍鎮
國公楊福子三官保應照例降一等承襲得旨楊福任將軍以來
甚屬效力三官保著仍襲封鎮國公○乙丑命副都統蘇爾德經
理圖呼魯克等處屯田○戊辰以朱作鼎爲安徽按察使由江南鹽驛道
遷○己巳禮部奏御史董之燧奏參會試同考官儲在文等作弊

之處請將原任左都御史劉謙等提至京城質審 上諭大學士等漢大臣等有好干預科場之事者看來不待臨期往往前一年先爲之計或選刻文章或刊行窗稿令人誦習揣摩場中一見卽可知爲何人矣故選文刻稿皆應懲戒總之科場事當秉至公不可稍參私意去歲考試官聲名不好朕亦聞之但劉謙已於別案革職若又提審牽連甚多著從寬免將董之燧參本發還○諭趙晉果否身死之處前令張伯行確查今究竟如何著問張伯行具奏尋大學士等奏臣等詢問張伯行據云趙晉未死之處實係傳言尙未有確證 上曰此案甚大牽連人亦多且府縣官皆因此誣誤若趙晉果不死便當查拏若已死便當結案將此交與刑部速行完結○庚午刑部左侍郎薩爾臺以年老乞休允之○癸酉上還駐暢春園○乙亥以陝西蘭州等處連歲被災命散給饑

民口糧外每畝再給籽粒五升○丙子以白潢爲湖北布政使王

沛愼爲貴州按察使

由四川建昌道遷

○禮部奏安南進貢禮物請交內

務府察收

上諭大學士等安南國年例進貢犀角象牙物旣沈

重道復遙遠運送勞苦非所以柔遠之意嗣後著將犀角象牙免其進貢○己卯 上巡幸畿甸啟鑾○甲申予故兵部左侍郎阮爾詢陝西巡撫雍泰祭葬○庚寅戶部議准御史董之燧奏直隸各省內有丁從地起者其法最善但愚民每急欲售地地去而丁存貽累無窮嗣後請民間買賣地畝其丁隨地輸課從之

三月丁酉原任廣西新太營參將王啟雲子武舉王士懷奏右江猺人猖獗臣父王啟雲率官兵往勦中傷身亡提臣以輕躁指參蒙 皇上不加議處匍匐來京謝恩得旨武職官員皆係朕簡用之人故俱實心效力以盡厥職無有退縮者王啟雲人材壯健曾

有效力處朕深知之授爲參將猺人圍葛承州時王啟雲領兵奮力勇戰以致傷亡甚爲可嘉著該部議卹具奏尋議王啟雲應贈爲副將得旨依議王士懷著照難厯例錄用○庚子 上還京師○辛丑諭議政大臣等差往策妄阿喇布坦處之克什圖保住並澤卜尊丹巴胡土克圖之使人楚楊託音及策妄阿喇布坦差至澤卜尊丹巴胡土克圖之使人潘提忠內等來京朕詢問策妄阿喇布坦情形皆已悉知策妄阿喇布坦乃巨猾奸詭之人甚屬無恥以朕之使臣非係使臣旨意非係諭旨是部文等語今爾諸大臣等向克什圖保住等詳詢策妄阿喇布坦情形將克什圖保住及楚楊託音潘提忠內等一同遣往其作何遣往之處爾等會同副都統以上並九卿大臣各陳所見詳議再傳諭漢大臣等從前但以兵糧牲畜路遠難到爲念今祁里德處糧米見賸有二千餘

石而西路之米亦皆陸續運到兩處之米委屬充裕無容計慮朕從前中路出兵時曾於沿途按站留米令煮粥以養贍營中困乏之步行跟役並貿易人等大有裨益今兩路進兵之站亦應照此行將軍席柱胷中毫無主見一應軍務糧餉俱將軍之責伊云我但統領兵丁運米之事與我無涉糧到我卽行等語可見席柱無將軍之才此處亦著確議再總兵官路振聲一聞侵犯哈密卽領兵往救且聞伊愛養標下兵丁甚屬出力路振聲著授爲參贊據策妄阿喇布坦奏懇遣使一賢能大員等語克什圖保住出使策妄阿喇布坦處所已經數次今加伊等大銜前去卽係大員矣再凡爲使臣者果能一體同心於事方克有濟若內有不睦互相掣肘彼此言語矛盾一有差失則無益於事伊等有不合處卽當明言爲是再派出在京一人偕克什圖保住前去此處亦著會議書

諭旨時令克什圖保住等面看繕寫伊等俱以爲宜其再明示諸大臣我兩路兵馬牲畜糧米一應俱已齊備兩處軍中業已種地收穫可期此番使臣到策妄阿喇布坦處得確實情形卽將大兵逐漸進至伊地告以會講遣往並非進剿之兵亦無不可也○乙巳大學士等奏臣等遵旨問欽天監春分之日風候從何日起據監正明圖等云是日風從西北乾方來 上曰朕常立小旗占風並令直隸各省凡起風下雨之時一一奏報見有京師於是日內起西北風而山東於是日內起東南風者古人云隔里不同風此言最確又嘗考驗雷聲不出百里之外易云震驚百里若霹靂則不過七八里也至於礮聲竟可聞於二三百里從前蘆溝橋演礮天津皆聞之此其驗也書籍所載雖不可盡信然亦有鑿鑿可憑者書中云北方苦寒之處冰結十丈春夏不消今果有其地又淵

鑒類函有云碣鼠有重至萬斤者今亦有之其形如象牙亦似象牙但稍黃耳此皆與古書相符者也又諭地理上應天上宋儒云天下至大不可執中國地方推算其言甚精而有理中國山脈皆由崑崙而來彼地四面有江土人呼崑崙爲枯隴又云疆地推算天象中國與瀚海俱在赤道四十五度之內四十五度之南水皆向南而東流四十五度之北俱向北流此皆天文地理相合處也大學士等奏曰皇上於天文地理逐一考驗精確實前人所未發也○召西安將軍席柱還以護軍統領晏布代之○癸丑圖爾朗特貝子阿喇布珠爾奏請軍前效力命協同青海台吉達顏貝勒益蘇克汪扎爾等率兵戍噶斯口○甲寅諭宗人府自王貝勒以下至閒散宗室以上有年長未許配之女查明具奏俟朕親爲擇配其中有情願不情願者亦著陳奏至於無力出嫁者朕給匱

具嫁之○丙辰諭大學士等朕觀今人皆能勤於讀書昨將各部院司員輪班引見出題考試完篇者居多卽不能詩文之人所書出身履歷亦甚明順若不知文義如何居官辦事今讀書之人甚多大是好事○戊午九卿等議覆貴州巡撫劉蔭樞奏請緩圖北征一疏查劉蔭樞本不知兵且遠在天末未悉邊界情形妄爲陳奏交與該部議處得旨策妄阿喇布坦無知蠢動侵擾我哈密應發大兵卽行殄滅但朕好生爲念不忍驟加剿除因備兵邊地遣使宣諭俟其悔罪自新爲中外生靈計其萬全措置之際必籌其前後慮及久遠防微杜漸始合機宜自策妄阿喇布坦侵擾哈密以來朕從容與大小臣工公同商酌辦理軍務並未嘗有逞一己之怒形諸聲色及統兵親剿之處劉蔭樞聽信譎傳邸鈔妄行具奏以爲分清邊界便可畢事如策妄阿喇布坦乘間竊發邊民能

保不受害乎劉蔭樞尙未衰邁著乘驛前赴軍前盡心周閱矢公詳議具奏

閏三月辛酉朔吏部奏雲南布政使盧詢前任江蘇按察使時失察得麟家人多太潛往上海應於按察使任內降二級調用從之○壬戌兵部奏前阿南達奏稱自邊界至噶斯口一千七百里今鑾儀使董大成奏稱自嘉峪關至噶斯口三千餘里董大成誤信協領吳通寶導引不由阿南達所行之路繞道紆行以致兵丁勞苦馬匹損傷應將董大成革退鑾儀使從之○癸亥諭吏部湖廣總督額倫特著署理西安將軍事務並協同川陝總督辦理軍餉湖廣地方緊要總督事務著工部右侍郎滿丕前往署理○甲子以薩睦哈爲西安布政使由按察使遷○戊辰以馬晉台爲盛京刑部侍郎由盛京工部理事官遷白潢爲貴州巡撫由湖北布政使遷○壬申諭吏部行

取直隸各省知縣覃岱等四十二員俱著授額外主事不拘月分

遇缺卽行題補

○以永泰爲西安按察使

由郎中遷

○戊寅以金世揚

爲雲南布政使

原任江蘇布政使

宋致爲湖南布政使

原任四川布政使

牟欽元

爲湖北布政使

原任江蘇布政使

○己卯議政大臣等議覆侍衛阿齊圖

奏青海台吉等初言將胡必爾汗送往紅山寺繼又請將胡必爾

汗送往宗喀巴寺始終推諉不令起程自奉旨令護軍統領彥布

統兵駐紮西甯四川提督康泰松潘總兵官程正李等整兵豫備

復屢次曉諭青海台吉等伊等果爾恐懼於三月十五日將胡必

爾汗送至宗喀巴寺居住但青海二翼台吉今雖和睦恐不能久

請將羅卜藏丹津察哈丹津達顏管理右翼事務額爾德尼厄爾

克托克托奈阿喇布坦鄂木布管左翼事務再派大臣同郎中長

受主事巴特麻至青海會盟令其永遠和睦應如所請得旨依議

著公策旺諾爾布侍衛布達里前往○壬午諭大學士等直隸巡撫趙宏燮因順天永平兩府所屬地方米價騰貴民多乏食奏請借帑銀差官貴買賤賣再借莊頭積貯之米減價糶賣朕思治天下之道以養民爲本當此太平之際而使民乏食可乎如從前福建廣東遠處偶遇災荒猶海運賑濟況京師畿輔之地乎去年順天永平保定河間宣化五府因雨水過多米穀歉收已將錢糧盡行蠲免積貯之米減價糶賣見今閭閻積貯無多若又以銀買穀則米價益加騰貴今京倉通倉之米甚多將倉內所貯之陳米發二十萬石差堂司官運至各處地方不論旗民確查賑濟窮民始得均霑實惠且直隸北四府地方有水路可通卽由旱路運去亦不甚遠不過在人區畫而已至於運米腳價以米給之亦可煮粥之柴以米易之亦可果如是更爲有益當青黃不接之時發通倉

米於近京之地減價糶賣今又以陳米賑濟則小民斷無乏食之虞矣又諭朕聞今年直隸南四府地方麥苗甚好但麥收時亦止有地之人得食而已未種麥之人何由而得朕意此番賑濟須至九月民方不致乏食每歲五城煮粥賑濟至三月卽止今尙未停止於民大有裨益古之人君居深宮之中不知民間疾苦者甚多朕巡行各處曾目擊之故知之甚確又於直隸各省年穀豐歉時訪問地方大吏所以不敢隱瞞朕凡事但求實濟不務虛名卽如積貯之事聞之似善而行之甚難從前連歲豐收朕曾諭地方官令民間節省積貯但窮民一年所得餬口之外別有費用何得餘贍至於社倉一事李光地任直隸巡撫時曾以此爲有益卒不能行今太平已久生齒甚繁而田土未增且士商僧道等不耕而食者甚多或有言開墾者不知內地實無閒處今在口外種地度日

者甚多朕意養民之道亦在相地區處而已陝西臨洮鞏昌等地
方雖不可耕種若於有水草之地效蒙古牧養則民儘可度日而
百姓但狃於種地不能行此昔年去山東賑濟人員曾云或有人
在牛旁不知取乳而食竟坐以待斃此皆不習之故耳爾等將趙
宏燮所奏之事會同九卿確議具奏尋大學士九卿等議覆將京
倉通倉米發二十萬石於大州縣先運三千石小州縣先運二千
石揀選各部院賢能官員親往散賑俟九月秋收時停止得旨依
議速行○刑部等衙門議覆奉差山西審事湖廣總督額倫特等
奏原任山西太原府知府趙鳳詔巧立稅規勒索銀兩應照枉法
受贓例擬絞但趙鳳詔受恩甚重不便照比例議罪應將趙鳳詔
擬斬監候秋後處決其贓銀十七萬四千六百餘兩照數追取入
官應如所擬得旨著九卿等會同確議具奏尋九卿等議覆趙鳳

詔應卽行正法 上諭大學士等趙鳳詔前者自謂清廉一文不取取錢無異婦人失節又奏鳴禮爲第一清官甚屬欺妄伊父趙申喬居官尙廉趙鳳詔如此貪濫不忠不孝極矣似此不忠不孝之人應當正法九卿議立決甚是但伊贓銀甚多不可不追著照數追比此本著暫收貯○癸未以黃炳爲山東按察使

由浙江鹽驛道遷

○甲申命五城粥廠展期於秋後停止

夏四月辛丑轉黨阿賴爲兵部左侍郎以查弼納爲兵部右侍郎

山內閣學士遷

○癸卯 上奉 皇太后避暑塞外啟鑾○戊申 上駐

蹕遙亭諭大學士嵩祝近問外省奏摺人等僉云麥苗甚好但路上未曾遇雨據此則曠旱不但京北地方矣見今麥穗秀齊若再不雨豈能生發結實朕望雨心切爾將此旨錄出發往京師令大學士九卿等再虔行祈禱○以順天永平二府災歉弛山海關米

禁○以薩哈布爲內閣學士

由光祿寺卿遷

○予故刑部侍郎明安祭葬

○乙卯 上駐蹕熱河

五月庚申朔諭大學士嵩祝自密雲縣至邊北雖雨水霑足無煩再禱但京城左右仍然曠旱朕心不安不知眾大臣亦念及否自前端午節恐互相宴會應行嚴禁並令各官竭誠祈禱將此旨速發京師傳諭九卿○辛酉諭扈從諸臣朕因祈雨屢降諭旨在京諸臣遲延日久並不奏聞今始奏稱熱河得雨臣等不勝忻幸之語止於此處得雨有何忻幸部院諸臣但知營求財賄在家安逸而已求雨之處未必親到朕兩降諭旨命嵩祝鈔發京師乃並不直書申飭又不嚴查奏參伊平日但務趨奉李光地趙申喬令於朕前稱伊之善今漢大臣輕視滿大臣咸習以爲常矣朕幾次令科道陳奏伊令科道緘口不言皆入李光地趙申喬之黨瞻徇情

面唯唯諾諾而已伊乃大學士也是非所在豈特當與眾言之卽於朕前亦當懇切言之朕所用大學士三十四人矣未見有如嵩祝者伊自謂能自守之人乃趨奉二阿哥隱匿德麟逃走之事與噶禮結親自守者果如是乎且索額圖噶禮朕皆誅之嵩祝豈更甚於索額圖噶禮朕不能誅之乎抑畏伊鑲藍旗之黨乎今滿洲大臣內無能令漢大臣心服者朕因仍用馬齊爲武英殿大學士兼戶部尙書穆和倫爲戶部尙書著嵩祝卽馳驛前往京城問用不勝忻幸之語者爲誰祈雨不到者爲誰嚴查奏參若仍徇情面一經覺察必將嵩祝並誅之陳名夏卽伊榜樣也○諭大學士嵩祝近觀部院諸臣並不以朝廷事務緊要民生關係重大爲念惟圖恩威由己多方設法極力結黨而已今部院諸臣越次升用者多而一切禮儀尙且不諳況其他乎今值曠旱之際朕心憂慮兩

發諭旨始見臣等不勝忻幸之語朕心深爲失望由此觀之九卿並未會集或止聽一人之言如此難免欺君之罪矣總之伊等結黨甚眾若非伊等援引之人科道言官何以不行糾參恐此風漸長故將原任大學士馬齊原任尙書穆和倫亟行補授爾齋此旨切責在京諸臣○壬戌諭大學士等京畿地方至今雨水未霑足朕心不勝焦勞自密雲至口外田禾甚佳及問各處來人俱云尙有雨水不足之處念京城人民輻輳就食者多且太平日久人口滋生多至數倍以此平素閭諄諄以此事面諭眾大臣今值曠旱之際若再不亟爲籌畫爲君爲臣者所理何事乎閱此次報內米價又長八旗官兵糧米定例於八月內支放今若候至八月米價必愈加騰貴著於五月初十日起卽行支放至京城米石若仍行減糶甚爲有益著再發米三萬石交與原派賣米官員減價糶賣

爾等傳諭戶部○諭署內務府總管散秩大臣觀寶去年直隸所

屬地方水澇未得豐收目今京師又旱朕心深爲憂慮自明日爲

始朕於宮中每日止進膳一次先人而憂後人而樂庶可感召天

和也○癸亥轉傳爾芻納爲戶部左侍郎以敦稗爲戶部右侍郎

由內閣學士遷○以阿錫爾爲刑部左侍郎劉相爲刑部右侍郎俱由左

史遷○甲子大學士嵩祝奏京師下雨日期得旨宋儒有言求雨得

雨旱豈無因此意甚深今雖下雨但雨勢未必遠及有何可喜之

處求雨斷不可止必處處霑足方可停止也○丁卯署內務府總

管馬齊以復授大學士赴熱河謝恩得旨馬齊著留此處辦事嵩

祝著在京辦事○己巳京師遠近雨足 上始復常膳○以尼雅

達爲內閣學士由內閣侍讀學士遷○庚午大學士嵩祝奏參尙書趙申喬

王項齡左都御史范時崇侍郎傅紳李華之學士蔡升元王之樞

彭始搏詹事王奕清於祈雨處俱不親到殊屬溺職應交吏部都察院嚴加議處大學士王掞副都御史郝林以患病爲辭於祈雨處親到一二次亦屬不合應交吏部察議近因雨澤未足重煩

皇上廬念乃九卿等不虔心祈禱反於奏摺內妄稱忤幸甚屬不合應將會題此事之九卿諸臣交與未預此事之九卿諸臣嚴加議處至於奏報雨澤霑足與否及浸地幾許之處實係禮部專責不行明白具奏甚屬溺職應將禮部堂官等交與吏部都察院嚴加議處臣既奉明旨不卽奏參實係庸劣愚昧應將臣一併交部嚴加議處從之○乙亥 皇子允祕生○丙子福建浙江總督覺羅滿保奏臺灣遠屬海外民番雜處南北兩路生番自古聲教未通今據臺灣鎮道詳報南北生番四千七百餘口傾心向化願同熟番內附得旨生番遠居界外從未投順今慕義輸誠請入版籍

著地方官加意撫恤儻有侵沒擾害者該督撫卽行指名奏參從重治罪○丁丑諭大學士等禮部已將大雨霑足停止祈雨之處具奏今內務府總管赫奕復將祈雨之處請旨奏事如此疏忽殊屬不合著將赫奕革去工部尙書並內務府總管其恩詔所得廕生亦著革退○乙酉以孫渣齊爲工部尙書

由都統遷

楊柱爲左副都

御史

山通政使遷

六月己丑朔九卿等遵旨察議尙書趙申喬王頊齡左都御史范時崇侍郎傅紳李華之學士蔡升元王之樞彭始搏詹事王奕清奏摺妄書不勝忻幸之語祈雨處又不親到殊屬不合俱應革職禮部尙書赫碩咨陳詵侍郎二鬲王思軾胡作梅祈雨乃其專責並不虔心祈禱雨澤曾否霑足之處又不明白具奏殊屬不合俱應革職大學士蕭永藻王揆學士星峨秦長壽吏部尙書張鵬翮

侍郎孫柱李旭生湯右曾戶部尙書傅爾笏納呂履恒兵部尙書
殷特布侍郎黨阿賴田從典刑部尙書賴都張廷樞工部侍郎王
度昭左副都御史董宏毅郝林通政使周道新祈雨處雖曾親到
奏摺妄稱不勝忻幸之語亦屬不合俱應革職留任大學士不將
在京諸臣不虔誠祈雨奏報遲延之處卽行指名參奏亦屬不合
應革職留任得旨趙申喬王頊齡范時崇傅紳李華之蔡升元王
之樞彭始搏王奕清俱著降三級留任恩詔所得廕生俱著革退
陳誥二鬲王思軾胡作梅俱著降五級留任恩詔所得廕生俱著
革退蕭永藻星峨泰長壽張鵬翮孫柱李旭升湯右曾傅爾笏納
呂履恒殷特布黨阿賴田從典賴都張廷樞王度昭董宏毅郝林
周道新俱著降二級留任恩詔所得廕生俱著革退四月內朕起
身前一日曾面諭大學士王揆爾氣色不好仍似有病今歲爾宜

在家調養王揆將此緣由並未聲明今若同眾議處與朕從前面
諭不符王揆著寬免○壬辰以大暑詔寬恤獄囚○丁酉以荆山
爲禮部尙書由禮部右侍郎遷○辛丑諭大學士等熱河地方雖日日布
雲時有雷電而雨未大沛問各處來人言京城四圍亦覺稍旱此
處自十五日起齋戒祈雨京城亦從十五日起一體祈雨將此旨
速行傳諭禮部○丙辰 上幸湯泉

東華錄

康熙九十八

臣王先謙敬編

臣周澹蕃校

秋七月辛酉 上還熱河○辛未侍衛阿齊圖奏臣於六月初六日到察罕烏蘇地方據台吉達賴等言察罕烏蘇水草既好地亦寬闊宜於駐兵若策妄阿喇布坦使人到青海必由此路若往西藏必由察罕托灰之路此兩路設兵防守則噶斯口以內更無可行之路再自噶斯口過打布孫瀚海有地名噶順可進色爾騰地方此處亦當設兵防守臣遣人往視噶斯口果無可以駐兵之處今將兵分爲四營駐紮察罕烏蘇令護軍參領欽第由等領兵駐紮噶順設汛防守報聞○戊寅領侍衛內大臣侯巴渾德等參奏鑾儀使護軍統領宗室納音圖冠軍使副都統欽拜遲誤 御轎

應交部議處得旨訥音圖賦性昏愚人亦庸懦著革職交該管王處行走欽拜著革職上諭領侍衛內大臣等本朝舊制王大臣及眾執事人等凡係辦理御用之物各極謹慎不至遲誤今漸染漢人習氣惟尙虛浮遲誤御轎之事無大關繫但該管官於御用之物怠忽從事情屬可惡朕今將伊等拏問觀鄂倫岱之意大以爲不然朕洞察其情必欲懲治以彰國法特諭爾等知之○癸未上行圍發熱河○是月免浙江蘭谿嚴州等八縣水災額賦有差

八月壬寅以長蘆爲內閣學士

由內閣侍讀學士遷

○乙卯吏部遵旨察議

原任奉天府府尹今升左副都御史董宏毅將承德等九州縣應徵米豆奏請改徵銀兩以致存倉米豆缺乏應降三級調用從之○是月免湖廣安鄉岳州等八縣衛江西甯州武甯等三州縣水

災額賦有差

九月己未 上駐蹕博洛河屯賜來朝外藩銀幣鞍馬及隨圍蒙

古官兵銀布○壬戌 上還熱河○戊辰 上聞貝勒允禩染患

傷寒降旨十四阿哥允禵向來與八阿哥允禩相好著伊同太醫

商酌調治○庚午以蔣陳錫爲雲南貴州總督李樹德爲山東巡

撫由登州總兵官遷○壬申 上奉 皇太后自熱河回鑾○癸酉兵部

議覆江南蘇松水師總兵官胡駿奏臣不諳水性請調極邊效力

應行文該總督將胡駿果否諳練水性之處查明到日再議 上

諭大學士等朕聞蘇松兵丁習俗甚惡自胡駿到任因其約束嚴

峻兵丁幾起釁端總督巡撫提督等欲潛行消弭故未奏聞至於

給餉俱係知縣等微員不能彈壓兵丁胡駿征剿海島勤勞素著

今爲兵丁惡習所迫故爾奏請改調部臣未悉此情議將胡駿果

否諳練水性之處行查該督誤矣儻因胡駿不諳水性另行改調則兵丁惡習愈長此斷不可況崇明遠在海島民稠地廣應將江南事簡地方道員移駐於彼以資彈壓著九卿議奏尋九卿等議胡駿不准改調請將江南江常鎮道移駐崇明監放官兵俸餉從之○甲戌 上駐蹕兩閒房問 皇四子和碩雍親王曰八阿哥病汝曾使人往看否回奏云尙未使人往看 上曰汝當使人往看○戊寅貴州巡撫劉蔭樞奏臣遵旨親赴巴爾庫爾前閱視滿漢官兵共立二十三營周圍二百餘里軍勢雄壯首尾相應但巴爾庫爾地方居雪山之後聞入冬大雪動深數尺儻道路壅阻糧何以運草皆覆壓馬駝何以牧放臣不勝憂懼謹密奏聞 上諭大學士等軍機事務關繫重大一言可以鼓勵士氣一事可以退縮人心本朝自 太祖高皇帝 太宗文皇帝 世祖章皇帝迄

今百有餘年所向成功事事上應天心以正討逆巡撫劉蔭樞乃讀書之人年已六十非屬無知初以朕爲不能忍怒及至軍前無可奏對又稱嗣後雪至三四尺糧何以運馬駝何食於此愈知其無能矣外藩蒙古共有百餘扎薩克人無一分糧餉馬無一束草乾自古及今極寒之地何以各安生業觀其一經雪後驚惶失措忘其身爲巡撫管轄文武之責如敵稍強必致效曹申吉羅森方光琛輩所爲也朕三統大兵曾當嚴寒盛暑久行沙漠不毛乏水之地於軍機事務以至調養駝馬無不熟悉後知古人論兵不得其道多無成功每致敗事深爲太息朕中路統兵至上都博洛河屯於三月十六等日遇雨雪風霰自京師運米出口馬匹肥者倒斃反多兵丁馬匹不甚傷損蒙古馬匹如常於此愈知古人乘春以圖蒙古之失策也朕近訓兵校獵至烏里雅蘇台八月十六

日嶺顛雪深尺許至行營中惟深七寸駐蹕二日雪已全消此去京師七百里卽如此矣設劉蔭樞見黑龍江東海北海等處冰結八尺之處必致奏請毀城郭棄地方盡行移徙矣古人云雪盈尺表瑞過尺成災劉蔭樞今奏稱巴爾庫爾地方雪深三四尺或係伊親見或係何人告伊之處並未聲明仍著劉蔭樞前去雪深三四尺果屬親見著據實奏聞儻聽信他人妄誕恐嚇之語亦著據實奏聞○己卯 上駐蹕密雲縣 皇四子和碩雍親王奏云臣使人往看八阿哥允禩病勢甚篤今欲先回看視 上允之後發來 上諭云四阿哥隨駕在外惟伊一人乃置扈駕之事奏請先回看視允禩觀此關切之意亦似黨庇允禩允禩醫藥之事卽著四阿哥料理○辛巳 上駐蹕湯泉因允禩卧病在暢春園路旁園內降旨將允禩移回家中之處著諸皇子議奏 皇四子欲移

允禩回家問及諸皇子俱說應當移回惟允禔憤怒云八阿哥今如此病重若移駐家中萬一不測誰爲承當激切攔阻將欲移允禩之事奏聞 上又降旨云八阿哥病極其沈重不省人事若欲移回斷不可推諉朕躬令其回京諸皇子議云八阿哥允禩見今病勢雖未至於十分沈重然已甚篤儻有不測允禩見駐之處乃皇父經由之御路所關非細理應移回一面奏聞一面卽將允禩移回家中○癸未 上命貝子蘇努舅舅佟國維大學士馬齊領侍衛內大臣公阿靈阿鄂倫岱侯巴渾德同往看視允禩病同四阿哥多方延醫竭力調治 皇四子和碩雍親王因至湯泉奏云向在途次 皇父問及曾使人往看八阿哥否及使人往看回稱病篤故爾奏請看視臣未審輕重實屬錯誤罪所難追況臣素不諳醫藥今旣送允禩到家臣無可料理之事奏知前後始末

上方釋然得旨所奏已悉○甲申 上奉 皇太后還京師○諭
大學士九卿詹事科道等國家設立科道寄以耳目重任建言參
劾乃其專責原任將軍席柱任都統時補授官員及披甲撥什庫
等混索賄賂爲西安將軍時尤貪婪不堪頃交議政大臣審訊眞
情盡露人無不知而科道等官竟不糾參昔年所用武大臣邇來
漸少所以補授都統副都統等官止視其效力處漸次升用但伊
等多不諳事體亦不能約束兵丁兵丁全無畏懼法度大爲廢弛
如原任右衛副都統赫遜圖人皆稱爲胡打鐵卒以殺人獲罪宗
室內朕亦嘗試用皆少不更事無勝任者至於總督巡撫但於地
方不生事年穀豐登錢糧清楚卽爲稱職或有人自謂清官縱妻
子奴僕暗受賄賂以此爲清朕斷不許如此清官何益之有且九
卿及督撫提鎮內居官貪婪行止不端者亦或有之科道官員卽

當從嚴參劾乃或因係某大臣保舉或因係某大臣門生故舊彼此瞻徇情面並不奏參間有條奏彈章亦止受人請託或欲使人畏懼自立威名耳至於會同保舉時或有欲舉之人指使他人舉出而已佯爲不知朕爲人君特從寬不深求而已非不知也爾等皆讀書之人性理一書公私甚明凡事一出於公斯爲善矣科道內有招搖生事索詐取財代人陳奏者九卿卽行參奏○諭聞山西陝西今歲收穫較往年甚豐但西邊見有軍務沿邊一帶地方錢糧及舊欠錢糧應予蠲免其在軍前綠旗兵丁所借錢糧免其坐扣今歲湖廣收成亦好湖南大熟湖北微不及江西雖覺稍旱究亦無妨江浙素稱豐富朕前巡幸南方時米價每石不過六七錢近聞竟貴至一兩二三錢如此民何以堪今江浙兩省被災地方錢糧作何蠲免之處爾等會同詳議具奏前張伯行會奏江南

之米出海船隻帶去者甚多若果如此亦有關繫洋船必由乍浦
松江等口出海稽察亦易聞臺灣之米尙運至福建糶賣由此觀
之海上無甚用米之處朕理事五十餘年無日不以民生爲念直
隸今年米價稍昂朕發倉糧二十萬石分遣大臣巡視散賑米價
卽平小民均霑實惠若內而九卿科道外而督撫提鎮悉體朕軫
念蒼生至意則天下無不理之事矣○是月免江南宣城山東秦
安湖廣江夏等二十九州縣衛水災額賦有差

冬十月丁亥朔諭大學士等張伯行條奏宜立社倉前李光地爲
直隸巡撫時亦會請立社倉朕諭此事言之甚易行之甚難爾姑
試行後試行之果無成效倉糧庫帑設官專理尙且虧空社倉所
收穀石交百姓收貯寺廟虧空又何待言耶其果否可行之處爾
等會同九卿詳議具奏○諭朕前會諭九卿科道等文武大臣內

有聲名不好者科道卽行奏參科道內有行止不端者九卿亦行
參奏今部院司官內有辦事雖勤而操守平常者亦著查參可傳
諭九卿○諭聞富甯安駐紮肅州地方秋毫無犯彼處兵民無不
歡悅誠無愧於大臣之道矣○諭見今緩決人犯長繫囹圄殊屬
可憫爾等會同九卿查其年分久遠情屬可矜者卽分別奏明發
落○辛卯允禩患傷寒病愈後屬內侍魏珠奏聞 上命將所停
允禩之俸銀俸米俱照前支給○壬辰以趙宏燦爲兵部尙書由廣
東廣西梁世勳爲戶部左侍郎由安徽○以郝林爲工部左侍郎
余正健爲左副都御史由順天府尹遷○以薩哈布爲禮部右侍郎由內
閣學士遷羅瞻爲左副都御史由左通政遷○癸巳諭戶部策妄阿喇布坦
侵擾哈密哈密已經徧置佐領卽與內地無異若不遣發師旅置
之不問斷乎不可故特徵兵備邊一切飛芻輓粟悉支正項毫無

累及閭閻然而行軍置驛及諸凡輓運皆由邊境今歲山陝二省雖年歲豐收喜登大有但邊民效力轉輸在所宜恤茲特大沛恩膏將山西屬前衛右衛大同懷仁馬邑朔州保德等州縣衛陝西屬府谷神木安塞綏德米脂安定吳堡保安榆林保甯常樂雙山魚河歸德響水波羅懷遠威武清平山丹高臺古浪莊浪西甯肅鎮甯夏左屯中屯平羅中衛靈甯平涼固原鎮戎西安慶陽阜城甜水河州蘭州洮州等州縣衛所堡康熙五十六年額徵銀八萬六千一百兩零糧米豆穀三十一萬七千七百二十五石零草二百七十六萬五千九百束零通行蠲免並將從前積年逋欠亦悉與蠲除○免山陝綠旗兵所借帑金○乙未予故兵部尙書公孫徵灝祭葬諡清端○丁酉議政大臣等議准吏部尙書富甯安奏巡撫綽奇前往勘閱肅州迤北地方可以開墾之地甚多酌量河

水灌溉金塔寺地方可種二百石籽種自嘉峪關至西吉水地方可種一百三十石籽種達里圖地方可種一千一百餘石籽種方城子等處地方可種五百餘石籽種臣查今歲西吉木地方達里圖布隆吉爾三處耕種共收糧一萬四千餘石布隆吉爾係沙土地明年應停其耕種至西吉木達里圖及金塔寺等處地方請勅正項錢糧派官招民耕種從之○戊戌吏部議准河道總督趙世顯奏管河官員必得在工年久諳練工程者方克勝任請將丁憂人員仍留河工效力 上諭大學士等河工告成二十餘年善後之方不可不講在工之人必年久諳練方能辦理譬於行軍務須曾經出征者始於營務熟諳況黃河之水遷徙不常最難疏治如下埽築隄建挑水壩非久於其地之人不能熟悉著照所議行但築隄亦有不同黃水難於修築而易於保固清水易於修築而

難於保固此又不可不知再清水暢流可以刷沙使河水深通水無倒灌之虞然欲使清水暢流必全閉六壩使盡由清口而出方能敵黃朕昔南巡乘船閱河隄內居民厯厯可見今於隄內望黃河行舟帆檣皆不可見可知近日河水之深矣○大學士九卿等遵旨議覆張伯行奏請直隸等地方建立社倉應不准行 上諭此議甚是設立社倉殊無裨益豐年猶可若遇饑饉之年開倉賑濟百姓幾至毆官明代李自成之亂亦由賑濟而起爲督撫者遇地方有此等事須善爲消弭張伯行任江蘇巡撫時地方有一二小賊恐爲所害甚至不敢赴常州會審如此張皇失措平日學問安在哉○諭人命案件關係重大不可稍有疏忽朕御極以來於奏讞刑獄之事必極其慎重細察情罪反復披閱幾可成誦如此詳勘毫無疑竇方分別輕重批發施行閱今年朝審情實人犯止

七十餘名迨三次覆奏後句決者不過二三十名除緩決人犯已

有諭旨今將年久者分別減等發落外其朝審情實人犯今年處

決著停止○以穆爾吉爲內閣學士

由翰林院侍讀學士遷

周道新爲左副

都御史

由通政使遷

○以楊琳爲廣東廣西總督

由廣東巡撫遷

李成龍爲安

徽巡撫

由山東布政使遷

○甲辰貴州巡撫劉蔭樞奏臣妄奏軍前雪深

奉旨令臣前往閱視但臣年老患病不能親往謹在甘州候旨得

旨劉蔭樞前奉旨親赴軍前並未周閱營壘卽稱患病不候諭旨

回至甘州且云入冬後雪深數尺恐懼陳奏今令伊親閱彼處積

雪情形據實陳奏又不遵旨往閱仍託病求回原籍若伊意欲乞

休久當奏請乃未奉旨之前願戀官職不請休致及至軍前稍經

寒雪卽舉動失措違旨退縮奏請回籍理應從重治罪但伊年老

居官以來操守尙清覽伊奏摺情辭甚屬可憫諭旨到時著卽回

貴州辦事從寬免其議處○丙午侍衛阿齊圖奏策妄阿拉布坦賊徒來馬廠偷盜馬匹官兵擊敗賊徒遁去臣隨遣官兵會同駐紮噶順汎界之護軍參領欽第由追緝蹤迹始知賊由山後過沙喇於欲來盜馬之時先執青海台吉羅卜臧丹濟布而去報聞○丁未諭吏部嗣後應引見教官俱不必來京著該督撫考試可用者補用年老不堪者革退○命署西安將軍額倫特駐師西甯協守噶順口○辛亥諭大學士等朕訪聞海外有呂宋噶喇吧兩處地方噶喇吧乃紅毛國泊船之所呂宋乃西洋泊船之所彼處藏匿盜賊甚多內地之民希圖獲利往往放船帶米載去並賣船而回甚至有留在彼處之人不可不豫爲措置也○太常寺奏冬至祀 天請遣官行禮得旨朕自御極以來大祀俱親詣行禮諸大臣以朕年高恐致煩勞請遣大臣恭代朕雖年高凡大祀每思親

詣行禮今朕躬康健仍親詣行禮○壬子諭大學士九卿等天下事未有不由小而大小者猶不可忽大者益宜留心爾等在衙門或能辦理事務或以清白自持亦止爲身計耳其關繫封疆大事未必深思遠慮也卽如海防乃今日之要務朕時加訪問故具知原委地方督撫提鎮亦或未能盡悉也朕南巡過蘇州時見船廠問及咸云每年造船出海貿易者多至于千餘回來者不過十之五六其餘悉賣在海外賣銀而歸官造海船十隻尙須數萬金民間造船何如許之多且有人條奏海船龍骨必用鐵梨笏木此種不產於外國惟廣東有之故商人射利偷賣卽加查訊俱捏稱遭風打壞此中情弊速宜禁絕海外有呂宋噶喇吧等處常有漢人自明代以來有之此卽海賊之藪也官兵出哨或遇賊船四五隻兵船止一二隻勢不能敵舵工又不奮力向前將領亦無可如何不

過尾追而已何能剿滅耶張伯行曾奏浙江之米多出海販賣斯言未可盡信然不可不爲豫防出海貿易海路或七八更遠亦不過二十更所帶之米適用而止不應令其多帶再東洋可使貿易若南洋商船不可令往第當如紅毛等船聽其自來耳且出南洋必從海壇經過此處截留不放豈能飛渡乎又沿海礮臺足資防守明代卽有之應令各地方設立往年由福建運米廣東所雇民船三四百隻每隻約用三四十人通計及數千人聚集海上不可不加意防範臺灣之人時與呂宋地方人互相往來亦須豫爲措置凡福建廣東及江南浙江等沿海地方之人在京師者爾等可加細詢朕令廣州將軍管源忠閩浙總督滿保兩廣總督楊琳來京陛見亦欲以此面諭之海外如西洋等國千百年後中國恐受其累此朕逆料之言又漢人人心不齊如滿洲蒙古數千萬人皆

一心朕臨御多年每以漢人爲難治以其不能一心之故國家承

平日久務須安不忘危爾等俟管源忠等到京後會同詳議具奏

○以法海爲廣東巡撫

由革退翰林院侍讀學士遷

○癸丑工部右侍郎王度

昭丁母憂准回籍守制○乙卯命散秩大臣阿喇衲赴巴爾庫爾

參贊軍務○是月免直隸隆平等六縣水災額賦有差

十一月丁巳朔以李錫爲工部右侍郎

由河南巡撫遷

王用霖爲山東布

政使

原任廣東布政使

○辛酉諭議政大臣等朕綜理軍務年久經歷甚

多且曾親統大兵安定邊塞眾議欲於明歲進兵又慮路遠糧米

難運其見不可謂非但大兵進剿策妄阿拉布坦勢不能當必致

逃避明年著暫停進兵加意耕種將糧餉馬匹豫備整齊後年再

行進兵其盛京甯古塔兵丁照舊發往京城之兵著暫停止策妄

阿喇布坦詞雖卑遜竟遣人盜我噶斯口兵丁之馬我兵豈可坐

守著將孔格扎布罕兵內揀選精騎由阿爾泰作三四路襲擊巴爾庫爾兵內揀選精騎作兩路襲擊此襲擊之兵遇可擊之處卽行襲擊可取則取應退則退相機而行襲擊後仍回駐兵之處策妄阿喇布坦地方必然震動其餘黨或有變端以致逃亡亦未可定我兵如此一舉其道路地勢皆可悉知將此詢滿漢大臣若仍欲明歲進剿爾等將原議具奏尋議明年應暫停進剿令孔格扎布罕之兵移近汎界駐紮加意耕種然我兵與其暫守不如兩路派兵襲擊至所派兵丁數目由何路襲擊及派領兵官員應令軍中大臣酌議奏聞從之○戊辰 上謁 陵啟鑒○癸酉予故理藩院尙書公阿靈阿祭葬○乙亥 上謁 暫安奉殿○丙子 上謁 孝陵至 仁孝皇后 孝昭皇后 孝懿皇后陵奠酒○乙酉刑部奏盜犯韓七等偷掘明朝陵寢爲首之韓七見在脫逃

獲日另結爲從之王五等擬絞監候秋後處決得旨偷掘先朝陵寢卽與掘伊祖父墳墓相同韓七著該管官嚴緝務獲到日著卽處斬王五等著立絞○是月免安徽邳州等十一州縣水災額賦有差

十二月戊子內閣學士彭始搏請回籍葬親允之○乙未以張聖

佐爲河南巡撫

由安徽布政使遷

張文燦爲湖廣布政使

由按察使遷

○戊戌

派兵戍布隆吉爾○庚子

上駐蹕熱河○乙巳

轉薩哈布爲禮

部左侍郎以羅瞻爲禮部右侍郎

由左副都御史遷

○以張廷玉爲內閣

學士

由翰林院侍讀學士遷

○戊申以年希堯爲安徽布政使

由廣西布政使遷

○

己酉

上還京師○壬子諭戶部朕巡行塞外車駕所過見今歲

秋成豐稔米價稱平惟是去年雨水過多田畝閒被淹沒朕蠲賦平糶轉漕分賑使民不至流離今者雖復有秋僅足支一歲之用

恐來年輸將尚多難繼是必再沛恩膏始可大培民力其順天永平所屬兩府三十五州縣衛所明年地丁稅糧通行蠲免積年逋賦亦並除之○乙卯諭理藩院青海已故親王扎什巴圖爾自效順以來一心向化伊子羅卜藏丹津人材亦優著封爲親王其台吉達顏係達賴巴圖爾之孫爲人誠實感朕深恩實心辦事甚屬勤勞著封爲貝勒台吉巴爾珠爾阿喇布坦扎卜阿喇布坦俱著封爲貝子台吉丹津著封爲一等台吉○是歲朝鮮安南來貢

東華錄

康熙九十九

臣王先謙敬編

臣周澗蕃恭校

康熙五十六年丁酉春正月乙丑諭內閣學士星峩泰等爾等曾出江南海差海船一年造若干應令報明監督於出洋時將前報過造船人名與船隻字號逐一查對方不至隱匿凡大船指稱貿易領票出洋每另泊一處用小船於各處偷買米石載入大船不知運往何所乍浦地方有隄一應貨物必於此遞運他處大船不能出入惟上海崇明等口甚屬緊要爾等傳諭九卿著議奏○丁卯以御纂周易折中頒賜羣臣○壬申增兵戍噶斯路○甲戌上幸湯泉○己卯諭諸皇子及領侍衛內大臣等世祖章皇帝曾以禮殯葬崇禎念太監王承恩盡忠並命大學士爲之殯葬

諸帝陵寢皆躬親奠醑命人看守歲時祭祀垂爲定例近日拏獲偷掘明代陵寢之賊部議將爲從者擬以充發朕思今日之百姓皆明代所遺之百姓也此與掘伊祖父之墓何異是以降旨將首從諸賊俱行處死但明代諸陵年久或看守之人不謹亦未可定爾等往各陵祭奠詳細查明具奏○以海壽爲左副都御史

由通政使

○庚辰兵部等衙門遵旨會同陞見來京之廣東將軍管源忠福建浙江總督覺羅滿保廣東廣西總督楊琳議覆凡商船照舊東洋貿易外其南洋呂宋噶嚨吧等處不許商船前往貿易於南澳等地方截住令廣東福建沿海一帶水師各營巡查違禁者嚴拏治罪其外國夾板船照舊准來貿易令地方文武官嚴加防範嗣後洋船初造時報明海關監督地方官親驗印烙取船戶甘結並將船隻丈尺客商姓名貨物往某處貿易填給船單令沿海口

岸文武官照單嚴查按月冊報督撫存案每日各人准帶食米一升並餘米一升以防風阻如有越額之米查出入官船戶商人一併治罪至於小船偷載米糧剝運大船者嚴拏治罪如將船賣與外國者造船與賣船之人皆立斬所去之人畱在外國將知情同去之人枷號三月該督行文外國將畱下之人令其解回立斬沿海文武官如遇私賣船隻多帶米糧偷越禁地等事隱匿不報從重治罪並行文山東江南浙江將軍督撫提鎮各嚴行禁止從之

○辛巳

上還駐暢春園

○以孔毓珣為廣西按察使

由湖廣上制南道遷

○壬午以徐元夢為左都御史

由浙江巡撫遷

○甲申

上因皇八子允

禩病愈遣人傳諭曰爾疾初愈思食何物可奏朕知朕此處無物不有但不知於爾相宜否故不敢送去允禩至門上跪求奏稱諭旨內不敢二字承受不起上悵然諭諸皇子曰允禩往往多疑

每用心於無用之地朕因伊病初起遣人傳諭云爾想何食物可奏朕知朕此處無物不有但不知於爾相宜否故不敢送去伊反以朕旨內不敢二字懷疑奏稱承受不起來門上跪求於無事中故生事端眾人觀之成何體統

二月丙戌朔

上巡幸畿甸啟鑒

○以楊朝麟爲江蘇布政使

由江

西按察使遷

○貴州巡撫劉蔭樞遵旨自軍前回黔行至西安以病奏

請解任得旨劉蔭樞著仍速赴任所○庚寅多羅順承郡王諾羅布薨賜銀二千兩發引時遣皇五子恒親王允祺往送予祭二次造墳立碑諡曰忠○辛卯以朱軾爲浙江巡撫

由通政使遷

○予故左

都御史兼翰林院掌院學士揆敘祭葬諡文端○欽天監奏正月二十一日奉有厯日內所列男女九宮以上元爲中元傳誤已久宜悉依朕所定星厯考原更改之旨今以康熙二十三年甲子爲

上元男起一宮嗣後中元甲子起四宮下元甲子起七宮三度花
甲循環一百八十年周而復始謹將康熙五十七年更改三元九
宮民厯式樣繕寫進呈下所司知之○乙未命副都統丁壽圖拉
率盛京船廠兵赴祁里德軍○丁酉刑部議覆直隸巡撫趙宏燮
奏假稱誠親王允祉遊行山西各省之惡棍等查拏治罪等語應
行文山西等五省將假稱妄行之惡棍嚴拏並將經過地方失察
文武官員交部議處得旨著選賢能司官分往山西陝西四川湖
廣廣西諸省會同巡撫將光棍嚴拏務獲並將初次接受展轉遞
報沿途地方文武各官奏參○己亥以祁國祚爲江西按察使由直隸霸昌道遷○癸卯 上還駐暢春園○丁未諭大學士等嗣後各省
大盜案件爾等會同三法司將此內有造意爲首傷殺人者一二
人正法餘俱減等發往黑龍江等處著爲令○辛亥諭吏部左副

都御史管順天府府尹事余正健居官雖清全不能辦事伊原由祭酒擢用今仍以祭酒銜在修書處行走○癸丑兵部議覆四川巡撫年羹堯奏越巂衛阿羊蠻加巴貫子等擾害地方殺死官員臣調兵於十一月初八日抵越巂差員曉諭仍前抗違臣卽撥將弁堵截自十三日至二十七日攻克巴沽白石巖寨殺傷賊蠻數百加巴貫子遠竄臣於二十八日撤兵回省查加巴貫子等二逆應令該撫速行設法擒獲從之

三月丙辰朔諭大學士等免江南逋賦一事似有情弊前總督赫壽奏請求免舊欠錢糧部議不准行伊又以特恩或出自上摺奏求免朕批令繕疏具奏今赫壽復行奏請戶部滿大臣力主不行甚是夫旣經部議不准而赫壽以已完之事復奏謂無情弊可乎此必京中大臣札託赫壽商議已定方如此奏耳爾等卽同九卿

在午門前嚴詰赫壽將屬託之人舉出如有隱諱斷不寬宥○丁巳上御經筵○戊午以祭酒銜余正健提督雲南學政○庚申諭大學士九卿等總督巡撫提督總兵官皆可密奏地方有事卽當據實奏聞前者四川之民流往貴州地方者甚多貴州巡撫密奏可知四川巡撫能泰之無能江南三江口地方朕曾駐蹕此處鹽賊藏於蘆葦之處甚多地方官並不查拏至於山東地方鹽賊於沿村買賣之處散鹽於百姓公然勒取重價以致官鹽壅塞不行商旅受害地方官並不查拏亦不據實申報此中賊首旗下逃人甚多朕差兵百人往拏矣此等事必待朕親聞差人往拏地方官職守何事皆係不實心效力以至於此曹寅李煦曾有密摺啟奏其江南山東之督撫提督總兵官內並無一人據實奏聞適拏獲之盜甚多竊福陵金鑪之賊亦在其內此賊曾經報死今復

被獲如此重犯脫逃仍復作賊者不少卽如假稱誠親王允祉巡視五省招搖一事年羹堯雖經奏聞不卽行緝拏亦屬不合朕已差人各省查拏必獲方已不然則狂妄書生將風聞爲實事遂以誠親王允祉於各省嚇詐取賄筆之於書此處關繫聲名非小地方官不行查訪報明乃爲之豫備驛遞謂無干法紀可乎不但王所差之人卽朕所差密訪之人爾等諸臣亦當察問虛實密奏有關國體不可輕忽前于來鳳私自出京於各省生事朕已查拏問罪此等不畏王法假冒王差膽大生事者不可謂無其人凡有旗人見在各省或已經回京該旗逐一查明具奏若隱瞞不奏朕一經查出或被旁人舉首定照軍法治罪決不寬恕朕嘗觀書見唐明皇遊月宮宋眞宗得天書此皆好事狂妄書生僞造豈可以爲實而信之乎又宋太祖明太祖皆有易服微行之事此開勅帝王

恐人作弊昌言於外耳此等事朕斷不行舉國臣民以及僕隸未有不識朕者非徒無益亦且有妨大體况欲知天下事亦不繫於此也○諭大學士等趙申喬奏錢局鼓鑄一摺內有鉛將朽爛之語若鉛至朽爛金銀亦必至蟲蛀矣著趙申喬明白具奏○甲子戶部議覆長蘆巡鹽御史田文鏡奏請將山東所裁鹽引補足辦課應准行 上諭大學士等鹽務朕所深悉加引雖可增課然於商人無益如兩廣鹽課累年虧空至一百八十餘萬職是故也戶部大臣往往錙銖必較而有關百餘萬之國帑反置之不問殊覺失宜辦理鹽務必得廉能素著實心辦事之人庶正課不至有虧商人亦不受累著問九卿具奏○河道總督趙世顯奏請就近撥兩淮鹽課四十萬兩運至河庫備用 上諭大學士等趙世顯奏請撥銀四十萬收貯河庫見今正值軍需之時一應錢糧必須明

晰一年河工所用數目何項支銷著查覈具奏河工乃極險之處
看守亦難今具呈願往河工效力之人甚多伊等若無所利何故
踊躍前往著問九卿○吏部尙書富甯安奏巴爾庫爾一路兵揀
選八千五百名分爲兩路前往襲擊策妄阿喇布坦邊界烏魯木
齊吐魯番等處得旨軍務關係緊要著將尙書富甯安授爲將軍
給與印信其署理西安將軍事務總督額倫特見在西甯駐紮彼
處事件無多著額倫特前往駐兵之處與富甯安會同商議料理
總兵官王以謙係旗人曾歷任西安副都統彼處又有郎中長受
將駐紮西甯之西安滿洲兵綠旗兵令王以謙長受管轄肅州地
方甚屬緊要延綏總兵官李耀停其前往穆賽等處令將伊新帶
之兵前赴肅州駐紮看守今旣遣兵前往襲擊策妄阿喇布坦之
汛界地方其畱後接應及緊要形勢之地安營看守接運糧餉等

事關繫重大富甯安額倫特二人內著一人帶領襲擊之兵前去
畱一人料理事務若吐魯番地方可取則取將伊處米石充作口
糧食用遂以彼力協同看守儻力稍單弱有由厄倫哈畢爾漢一
路所進五千之兵卽將此兵酌量調往併力看守過冬之時運送
米糧牧放馬匹及防敵人之潛劫襲後等處務須詳加籌畫看守
吐魯番之兵不可撤回別路襲擊之兵作何張大軍勢著兩路大
臣公同確議在於要緊適中之處暫行駐紮若易取而難守則仍
照前議令其襲擊而回烏魯木齊布婁兒布喇罕厄倫哈畢爾漢
四路之兵亦令襲擊而回此等軍務萬里之外不便請旨遵行此
處亦難遙度指示令軍中大臣等酌量詳議作速遣人知會阿爾
泰路之大臣等互相約定日期相機而行著議政大臣都統滿漢
大臣等各抒己見詳議具奏○乙丑福建巡撫陳瓚以巡撫衙門

一年支用賞兵給役並各項費用銀兩奏聞得旨前陳瓚奏稱將此項公用銀兩撥充餉銀曾諭以督撫等將此項銀兩充餉具奏者朕俱批知道了並未准其撥充緣此項係伊等應用之銀並非正項錢糧若撥充餉銀嗣後不肖之徒必將此項銀兩充餉爲正項此外又行侵蝕索取諭旨甚明且此項銀兩滿保亦曾在朕前陳奏凡係動用正項錢糧例應奏銷此並非正項陳瓚將伊等所用銀兩數目瑣屑具奏殊屬不合著嚴飭行○丙寅以王景曾爲左副都御史由太僕寺卿遷○辛未諭大學士等記注官陳璋於今年三月內查閱檔案鈔朕去年十二月所諭江南錢糧之旨與趙熊詔伊等皆屬有心特以朕於去年有欲免江南舊欠錢糧之意偶爾諭及今年未行蠲免伊等欲將朕前後互異之處指出書寫耳去年兩江總督赫壽摺奏請蠲前項錢糧朕批令繕本具奏及繕本

具奏後朕知赫壽受人屬託又彼此私同商定具奏欺朕朕以西
邊正值軍需之時故舊欠未准蠲免照部議分年帶徵朕御極以
來蠲免天下錢糧數千萬豈有惜此些微舊欠之理江南官員眾
多赫壽惟欲沽取美譽而民殊不感戴聲名甚劣朕於事無不經
歷人亦焉能欺朕朕豈肯以大權授人乎若不將此故曉諭諸臣
皆謂朕從前諭旨不符所繫非輕且漢人著作文集內有將未題
之稿云欲行具奏以事已完結未獲具奏等語似此並未入告者
尙且書寫况其他乎起居注衙門自古未有久遠設立者亦有旋
立旋止者或因所記不實故耳朕聽政之日記注官入侍伊等跼
蹐無措豈能備記諭旨侍班漢官歸寓後纂寫數日方攜至署與
滿官校看又每爭競是非則其遺漏舛譌可知諭旨皆有關繫惟
朕硃書諭旨及批本發科者始爲的確其起居注所記難於憑信

也陳璋趙熊詔鈔寫記注之處著問九卿具奏至大臣所辦之事功則歸己過則諉之年老糊塗爲人臣者在官一日當盡一日之心豈可以年老糊塗推諉耶今國家大臣俱係年高髮白之人朕亦年高今爾等以年老糊塗推諉若朕亦以年老推諉或致事理失宜諸臣能堪此乎○禮部尙書署倉場總督事荆山卒遣大臣侍衛往奠予祭葬諡端簡○戊寅議政大臣等議尙書富甯安進兵之處如吐魯番易於攻取看守卽令其攻取若有難於攻取看守之處仍照前諭襲擊而回得旨依議軍前革職效力之人甚多伊等俱係小人如僞造浮言搖動眾心應加嚴禁總兵官李耀帶領駐紮肅州之兵令富甯安酌量調遣巴爾庫爾一路授富甯安爲將軍給與靖逆將軍印阿爾泰一路授公傅爾丹爲將軍給與振武將軍印祁里德授爲協理將軍令都統穆賽率阿爾泰兵三

千出汛界於三路要緊適中地方以備應援其襲擊之兵兩路應互相約會路遠者先行路近者接續起程俱於七月前進兵乘秋季而回馬匹方可過冬著卽泰滿泰克什圖保住等將朕旨傳示兩路將軍○己卯諭議政大臣等布婁爾一路常關保委署副都統偕公博貝前往常關保員缺令軍前將軍大臣另行題補由厄倫哈畢爾漢一路前往 上諭大學士等曰今地方官總不實心辦事如每年修治道路開銷錢糧多至三萬餘兩小民不霑實惠朕今見發官帑差工部堂官前往料理所費不過二三千兩用夫不過數千人此皆由上司不能畱心查察故被屬下欺隱又山東鹽賊余大麻子本係偷盜 陵上金鑪案內人犯逃在山東爲偷販私鹽賊首千百成羣公然開店買賣人多畏懼不敢與抗其行劫之事亦甚多巡撫總兵亦未奏報朕問往來之人皆云山東地

方鹽賊多有害行旅朕差人密拏悉已擒獲山東人無不驚悅卽賊犯亦自首報云若非欽差嚴緝地方官斷不能拏獲我等也○壬午 上巡視河隄啟鑾○戶部尙書趙申喬遵旨回奏臣管理錢法事務上年十二月見寶泉局報稱有庫鉛二百二十六萬餘斤止存銅三十八萬斤臣恐無銅配鉛有誤鼓鑄是以繕摺具奏又臣居家時見鐵器物件安放地上年久卽有銹壞竊揣鉛與鐵相同堆積多時或有壞爛亦未可定冒行附奏原非確有實見今蒙 聖慈批示臣愚昧之罪誠有難追總由臣年衰智短致滋咎戾伏祈 聖慈寬宥得旨趙申喬從前奏稱鉛斤壞爛今又云鉛斤壞爛之處原非確有實見諉稱年老衰邁所致鉛斤之不壞天下通知趙申喬自幼讀書身登進士歷升尙書今年逾七秩無書不覽鉛斤壞爛之處見於何書趙申喬於所辦之事功則歸己過

則諉之年老衰邁可以糊塗了事國家事務作何處置耶且於緊要事情並不畱心稽覈錢糧出入漫無覺察惟於一二兩之細務膠執己見刻責苛求以鉛斤壞爛等語率意妄奏殊屬不合該部察議具奏○癸未 上至要兒渡等處徧閱隄岸駐蹕河西務○甲申以阿錫鼐署倉場侍郎

由刑左署

夏四月丙戌 上還京師○丁亥福建巡撫陳璘奏惠安縣知縣田廣運等十二員徵收錢糧有方居官聲名俱好懇恩破格鼓舞於吏治民生大有裨益 上諭大學士等此奏甚善徵收錢糧惟少加火耗百姓易於輸納從前馬齊任山西巡撫張鵬翮任浙江巡撫錢糧俱清楚蔣陳錫任山東巡撫時錢糧亦清楚外省總督巡撫居官好少加火耗錢糧斷不至缺欠也田廣運等俱著該部議敘○大學士等遵旨以陳璋趙熊詔鈔寫記注之事問九卿九

卿稱起居注事關機務陳璋等將去歲十二月所下之旨至今年三月復行鈔閱斷非無故應交與刑部嚴加治罪得旨陳璋趙熊詔從寬免交刑部著革職仍在原行走處效力行走○九卿遵旨查河道總督趙世顯河工動用錢糧數目繕摺呈覽並議見在河工效力陳思佑等八十九人及原在河工效力之人應行該督查有無用人員盡行發回嗣後情願河工效力人等俱停其發往從之○戊子命禮部祈雨○乙未諭大學士九卿倉場總督等邇年以來通倉積米甚多著分運直隸各府州縣存貯豫備於民甚有裨益每府或貯萬石每州縣或貯數千石附近通州河道者交與倉場總督運送其餘府州縣所運米石速行文直隸總督派地方官乘未雨之先輓運值此青黃不接之時於各府州縣平糶亦大有益於百姓其江南浙江如有應行截畱漕糧若干之處爾等一

併速議具奏又諭陰晴雨雪地方時候各有不同如雲南貴州四
川廣西等處從未以旱潦報荒朕御極以來每年北地之雪不過
三四寸許從未見有盈尺者昔年南巡在浙江曾見有尺許之雪
此外從未之有也朕每讀書至風不鳴條雨不破塊二語不能無
疑所謂雨暘時若是矣若雨竟不能破塊可乎點綴文章無所不
可如講到實際不能無議也卽如東南西北之風朕細加體驗俱
帶偏旁下雨亦有時候每月十八二十二二十四等日朕畱
心占驗往往有雨惟京師雨澤每年至四月或略愆期耳○丙申
以赫壽爲理藩院尙書由江南江總督遷范時崇爲兵部尙書由左都御史遷○
調殷特布爲禮部尙書以孫柱爲兵部尙書由吏部左侍郎遷○丁酉諭
大學士九卿等近來米價必不能如往年之賤昔大學士張英曾
奏桐城縣米價銀一兩可得三石見今四川米價亦復如此雲南

廣西貴州米價亦不甚貴大抵戶口稀少則米價自賤今太平日久生齒蕃息安能比數十年前之米價乎戶口殷繁固是美事然當豫籌安養之策今將米石運送各處或平糶或賑濟不過僅可餬口未必卽能充裕張伯行曾奏於永平府設立社倉永平知府近日行之甚苦社倉之法既屬難行通倉米石有餘不如運送各州縣爲便又諭從前工部及光祿寺每年動用錢糧數十餘萬近俱節省減至數萬但節用之事有益於此卽無益於彼近來鋪戶招買頗有難於辦理者以此故耳如欲禁止浙江養蠶織帛亦屬甚易然衣布者多則布價更昂於帛亦未可知朕記從前曾禁貂鼠而諸項皮張竟與貂皮同價總之天下事託諸空言則易見諸實事則難行文與辦事固不同也○戊戌轉喇多渾爲理藩院左侍郎以特古忒爲理藩院右侍郎

由郎中遷

○兵部議覆廣東碣石總

兵官陳昂奏天主一教設自西洋今各省設堂招集匪類此輩居心叵測目下廣州城設立教堂內外布滿加以同類洋船叢集安知不交通生事乞飭早爲禁絕毋使滋蔓查康熙八年會議天主教一事奉旨天主教除南懷仁等照常自行外其直隸各省立堂入教著嚴行曉諭禁止但年久法弛應令八旗直隸各省並奉天等處再行嚴禁從之○庚子大雨○諭九卿詹事科道等見在倉廩陳米甚多此時尙屬可用若再日久必致浥爛著於八旗放米之時除應領正數外將此陳米酌量每石加給或一斗或五升兩年間可以全完如此不但陳米可清而官兵亦有裨益矣又諭目下雨澤愆期今早雖得小雨未能霑足但從來月望時雨極難得昨十二十三等日朕固知未必有雨嗣後十八二十二等日或可望其大霑也今歲少雨處甚多聞江南大麥收有十分小麥

猶望雨山東巡撫未曾奏報得雨想亦未霑足昨河南巡撫有摺云今歲雨澤頗調窪地有十分收成朕心差慰又諭天時地氣亦有轉移朕記康熙十年以前四月初八日已有新麥前幸江南時三月十八日亦有新麥麪食今四月中旬麥尙未收又黑龍江地方從前冰凍有厚至八尺者今卻和暖不似從前又聞福建地方向來無雪自本朝大兵到彼然後有雪雲南貴州廣東廣西舊有瘴氣從前將軍賴塔進征雲南畱八百人在廣西俱爲瘴氣所傷今聞雲南惟元江微有瘴氣餘俱清和與內地無異矣○辛丑上奉 皇太后巡幸塞外啟鑾○戶部右侍郎呂履恒以保舉非人降調○癸卯諭大學士等今日覽刑部審取孟光祖口供摺內有架鷹牽犬侍衛太監往各省等語由此觀之各省肆行詐騙之人甚多若論放鷹應在口外豈有差往南省之理前差李秉中等

往畫輿圖俱給有憑文亦行文督撫令其知悉其賞賜浙江巡撫徐元夢書籍亦有憑據朕差人員如此嚴密而于來鳳一案刑部尙且恐爲朕所差遣之人審理時兩相瞻顧此皆督撫猶豫不奏餽送盤纏但圖苟且令其出境故至如此之極光天化日之下容此魑魅魍魎任意橫行如果王阿哥差人賞賜外省大臣官員衣服等物理應將差人畱住叩稟王阿哥等如果採買物件亦應將差去之人畱住一面將情由聲明各該管王等並將物件呈送則虛實立辨矣不應令差人遊蕩各省以壞該管王之聲名且如朕凡有恩賜卽將送去之人所賞之人俱登記檔案公賴士向太監鄒海要求取御用紅京米鄒海因不能得在街市採買誑哄賴士送去此事發覺已將鄒海正法朕稽察之嚴如此見今拏獲孟光祖在各省指稱阿哥名色誑騙行走殊屬可惡雖凌遲處死不足

以蔽其辜將審出之處著卽行文各省通行曉諭巡撫年羹堯曾
餽送過馬匹銀兩佟國勳亦餽送過銀兩段正將此等俱隱匿不
奏著明白回奏孟光祖在各處誑騙數年並無一人奏聞若趙宏
燮不奏朕尙不得洞悉此事若不發覺外省漢人卽認作實事編
書記載誣枉之事尙有甚於此者耶爾等會同九卿議奏○甲辰
以長蘄爲江南江西總督

由內閣學士遷

○調色爾圖爲吏部左侍郎

由盛

京兵部調

○丙午諭大學士等昔有一人將小魚十尾齎賜信郡王詐

稱此魚奉旨賜王不必謝恩如王給什物卽收領王覺其謊言挽
畱之暗使護衛看守欲往謝恩伊懼曰奉旨不令王謝恩豈可違
旨王曰上賜物何敢在家靜坐卽入謝恩啟奏伊謊言盡露卽行
拏問擬斬監候三載後遇恩詔乃免又有一人誑永平府知府指
稱二阿哥許以委署學院印務索銀一萬兩知府卽詳上司報部

部中奏明正法地方官員累皆若此孟光祖之徒何能妄行乎又諭外省總督巡撫提督總兵官俱有繕摺請安之例伊等請安摺子朕俱硃筆批發其在外大臣於朕所差人員前請安理所應當今聞凡由京出外及各省引見官員前亦俱請朕安甚屬不合伊等既欲請安即可繕摺具奏乃以督撫提鎮大臣在微員前跪請朕安殊不合理且雖行請安伊等亦不能轉奏嗣後在此等往來人員之前奏請朕安者永行停止○丁未雨○壬子 上駐蹕熱

河

五月丙辰京師雨○戊午諭大學士等覽禮部所奏據欽天監咨稱自本月初三日亥時微雨至初四日寅時止雨之大小霑足與否並未聲明欽天監若不行文禮部卽不奏聞矣寅時止雨應卽具奏如何未時方奏各處報雨皆未有如此之糊塗者此又欲效

去年之事耶將朕此旨發問回奏時著殷特布兩日內星夜到此回奏○已未 上幸湯泉○庚申九卿遵旨議覆凡王阿哥差人賜屬下外任官物件該督撫卽行奏聞如無勘合而擅索取船馬者卽行參究係妄行詐騙者正法地方官私自供應革職治罪督撫隱匿不奏降二級調用從之○壬戌禮部尙書殷特布以報雨遲延避旨赴熱河回奏 上命大學士等取供尋大學士等議應將殷特布等革職交刑部嚴加治罪得旨都察院見議此事此奏著暫存貯○甲子 上還熱河○戊辰諭左都御史徐元夢等近看科場之事盡爲大臣主持朕思內閣九卿大臣不立門戶不豫科場之事弊端自除大臣遇考期將至不惟爲子弟鑽營甚且爲他人圖謀如劉謙平素猶講道學及爲會試主考聲名甚是不堪又同考官儲在文看閱試卷皆專執己見同房閱卷之楊萬春不

得參酌此等陋習不可不知儆戒諭眾知之

六月乙酉予故內閣學士顧悅履祭○戊子江西布政使傅澤淵

丁繼母憂命回旗守制○癸巳命刑部寬恤獄囚○乙未以白潢

爲江西布政使

護理貴州巡撫

○都察院遵旨察議祈雨事關民生甚屬

緊要今五月初三日亥時下雨至初四日寅時止禮部遲至未時

具奏報雨乃禮部之專責俟欽天監知會後始行具奏殊屬溺職

應將尙書殷特布陳詵侍郎薩哈布王思軾羅瞻等革職得旨殷

特布著革職陳詵薩哈布王思軾羅瞻著革職畱任○己亥大學

士九卿等遵旨議覆民間私毀小制錢作銅變賣當嚴行禁止

上曰毀壞制錢原有明禁特因銅少價昂部內鑄錢不敷採買廢

銅以致小民射利毀小制錢作廢銅變賣朕辦事五十餘年屢次

更定錢法皆視民之形勢從未嚴行禁止銷毀小制錢亦屢爲寬

限前李光地請將小制錢嚴禁朕曾下旨斷不能行伊後知其不可始以朕所見爲是總督額倫特請於湖廣省發大制錢二百萬貫通用將小制錢銷毀朕以不可之故分晰下旨伊始曉然小制錢私毀如何禁止之處九卿詹事科道會同確議具奏○已酉予故兵部尚書趙宏燦祭葬諡敏恪